

# **Jismoniy shaxslarga maishiy chiqindilarni to'plash va olib chiqish uchun xizmatlar ko'rsatish bo'yicha namunaviy ommaviy shartnoma**

## **Shartnoma raqami-son shartnoma**

Shartnoma tuzilgan sana

Shartnoma tuzilgan hudud

Ushbu Ommaviy shartnoma (keyingi o'rinlarda shartnoma deb ataladi) O'zbekiston Respublikasi Fuqarolik kodeksining 358-moddasi talablariga muvofiq tuzilgan va jismoniy shaxslarga qattiq va suyuq maishiy chiqindilarni to'plash va olib chiqish bo'yicha xizmatlar ko'rsatish tartibini, shuningdek, Ijrochi tashkilotning nomi va tashkiliy huquqiy shakli, bundan buyon matnda (tashkilot nomi) "Ijrochi" deb ataluvchi nomidan ustav asosida faoliyat yurituvchi tashkilot rahbari (direktori) Ijrochi tashkilot rahbarining F.I.O. va ushbu shartnomani tuzish to'g'risidagi ommaviy taklif (oferta)ni qabul qilgan (akseptlagan) turar joy mulkdori (ijaraga, arendaga oluvchi), bundan buyon matnda "Iste'molchi" deb ataluvchi (keyingi o'rinlarda Tomonlar deb yuritiladi) o'rtasidagi o'zaro huquq va majburiyatlar hamda munosabatlar tartibini belgilaydi.

### **1. Mazkur shartnomada qo'llanilgan asosiy tushunchalar:**

**qattiq maishiy chiqindilar** – jismoniy shaxslarning hayoti va faoliyati hamda yuridik shaxslarning faoliyati natijasida hosil bo'luvchi organik va noorganik chiqindilar, shuningdek, ular hududida va obodonlashtirish obyektlaridagi tabiiy jarayonlar natijasida hosil bo'luvchi chiqindilar (oziq-ovqat va o'simlik chiqindilari, to'qimachilik mahsulotlari, o'rash-joylash (qadoqlash) materiallari, shisha, reziCna, qog'oz, plastmassa, yog'och chiqindilari, o'zining foydalanish xususiyatlarini yo'qotgan uy-ro'zg'or buyumlari, supurindi, shuningdek, qattiq yoqilg'ida ishlovchi maishiy pechkalar va isitish bug' qozonlaridan foydalanish natijasida hosil bo'luvchi chiqindilar);

**suyuq maishiy chiqindilar** – jismoniy shaxslarning hayoti va faoliyati hamda yuridik shaxslarning faoliyati natijasida hosil bo'luvchi chiqindilar (oqova suvlar, chiqindi to'kiladigan o'ralar va septiklarda yig'ilgan turli xil suyuq chiqindilar, ishlab chiqarish jarayonida hosil bo'ladigan yuvindi chiqindilari, markazlashtirilmagan kanalizatsiyaning najas chiqindilari);

**qurilish chiqindilari** – uylar, ma'muriy bino, ko'p kvartirali uy kvartiralarini qurishda, rekonstruksiya qilishda, ta'mirlashda va buzishda hosil bo'ladigan chiqindilar;

**"signal" usuli** – chiqindi tashish texnikasi bilan aholi yashash punktlarini aylanib chiqib, signal berish yo'li bilan Iste'molchilarni xabardor qilish orqali yakka tartibdagi turar joy sektoridagi qattiq maishiy chiqindilarni to'plash va olib chiqib ketish.

### **2. Shartnoma mavzusi**

1. Quyidagilar shartnoma mavzusi hisoblanadi:

a) Ijrochi tomonidan qattiq maishiy chiqindilarni to'plash uchun maxsus ajratilgan maydonlar (chiqindi to'plash shoxobchalari)dan va yakka tartibdagi turar joy sektoridan "signal" usulida qattiq maishiy chiqindilarni to'plash va olib chiqish bo'yicha pullik xizmatlar ko'rsatish;

b) Iste'molchi tomonidan qattiq maishiy chiqindilarni to'plash va olib chiqish bo'yicha xizmatlar haqini to'lanishi.

2. Yirik gabaritli maishiy chiqindilar va qurilish chiqindilari, chorvachilik, shuningdek, daraxt va butalarni kesish hamda agrotexnik ishlov berishdan hosil bo'ladigan chiqindilar va suyuq maishiy chiqindilarni olib chiqish Iste'molchilarning buyurtmanomasi asosida alohida to'lov evaziga amalga oshiriladi.

### **3. Iste'molchining huquq va majburiyatlari**

3. Iste'molchi quyidagi huquqlarga ega:

shartnomaga muvofiq zarur ko'lamda, belgilangan sifatda, uning hayoti va salomatligi uchun xavfsiz bo'lgan, mulkiga zarar yetkazmaydigan xizmatlardan foydalanish;

Ijrochidan xizmat ko'rsatishning amaldagi tartibi, talablari, qoidalari va o'zgarishlar to'g'risidagi, shuningdek, qattiq va suyuq maishiy chiqindilarni to'plash va olib chiqish bo'yicha xizmatlar tariflari to'g'risida ma'lumot olish;

Ijrochi tomonidan qattiq maishiy chiqindilarni olib chiqishning minimal davriyligiga rioya etilishini talab qilish: chiqindi to'plash shoxobchalaridan – bir kunda bir marotaba va yakka tartibdagi turar joy sektoridan "signal" usulida – uch kunda bir marotaba;

o'n ikki oydan ortiq bo'lmagan davr uchun oldindan haq to'lash, keyinchalik tegishli tariflar oshganda qaytadan hisob-kitob qilmaslik;

Ijrochi tomonidan qattiq maishiy chiqindilarni olib chiqib ketish jadvaliga rioya qilinmagan hollarda Ijrochining operativ tartibda qattiq maishiy chiqindilarni olib chiqib ketish choralarini ko'rish lozim bo'lgan dispetcherlik xizmatiga Dispetcherlik xizmatining telefon raqami telefon raqami orqali buyurtmanoma berish;

Ijrochi tomonidan shartnoma majburiyatlari sifatsiz bajarilgan hollarda Ijrochiga yozma, elektron yoki og'zaki shaklda shikoyat qilish va Ijrochidan xizmatlar to'liq ko'rsatilmaganligi yoki tegishli bo'lmagan sifatidagi xizmatlar ko'rsatilganligi holatini tasdiqlovchi dalolatnomani tuzishni, shuningdek, aniqlangan kamchiliklarning belgilangan muddatlarda bartaraf etilishini talab qilish;

xizmatlar ko'rsatilayotganda Ijrochi aybi bilan yuzaga kelgan kamchiliklarning bepul bartaraf etilishini talab qilish;

doimiy yashash joyida vaqtincha bo'lmaganligining hujjatlar bilan tasdiqlangan davr yoki shartnomada belgilangan tartibda xizmatlar ko'rsatilmagan davr uchun qattiq maishiy chiqindilarni to'plash va olib chiqish bo'yicha xizmatlarga haq to'lash majburiyatlaridan to'liq ozod bo'lish;

qattiq va suyuq maishiy chiqindilarni to'plash va olib chiqish bo'yicha sifatsiz xizmat ko'rsatilganligi sababli, agar Ijrochi o'z vaqtida shartnomani bajarishga kirishmasa yoki sifatsiz xizmat ko'rsatsa, zararlar undirilishini talab qilib sudga murojaat qilish. Iste'molchi qonun hujjatlariga muvofiq boshqa huquqlarga ham ega bo'lishi mumkin.

#### 4. Iste'molchi quyidagilarga majbur:

qattiq va suyuq maishiy chiqindilarni to'plash va olib chiqish bo'yicha ko'rsatilgan xizmatlar uchun to'lovlarni ushbu shartnomada belgilangan muddatlarda o'z vaqtida va to'liq miqdorda to'lash;

konteynerda to'plash tizimida – chiqindi to'plash shoxobchalarida chiqindilarni joylashtirishda chiqindilarni konteynerlarga tashlash;

to'plashning "signal" usulida – qattiq maishiy chiqindilarni o'z uylarida saqlash va Ijrochining qattiq maishiy chiqindilarni olib chiqish jadvali bo'yicha yetib kelgan maxsus avtotransport vositasiga joylashtirish;

qattiq va suyuq maishiy chiqindilarni ruxsat etilmagan joylarga va obyektlarga tashlamaslik hamda joylashtirmaslik (ko'chalarga, suv yo'llariga, ariq va qattiq hamda suyuq maishiy chiqindilarni to'plash va ko'mish uchun belgilanmagan boshqa joylarga, shu jumladan, avtotransport vositalaridan ularning to'xtashi, to'xtab turishi yoki harakatlanishi vaqtida);

qattiq maishiy chiqindilarni ularni joylashtirish obyektlarida (idishlar, yer o'ralari va hokazolar), tashkilot hududida, dalalarda va aholi yashash punktlarida yoqmaslik;

ko'p kvartirali uyning umumiy foydalanishdagi joylarida qattiq maishiy chiqindilarni to'plash va saqlash joylari tashkil etilishiga yo'l qo'ymaslik;

qattiq va suyuq maishiy chiqindilarni maxsus avtotransport vositasiga ortish uchun Ijrochining ortish joyiga bimalol o'tishini ta'minlash;

chiqindi to'plash konteynerlari, chiqindi to'plash shoxobchalari, chiqindi to'plash kameralari va boshqa uskunalarning nosozliklari aniqlanganda Ijrochini darhol xabardor qilish;

o'zlarining mulki bo'lgan ko'p kvartirali va yakka tartibdagi uylarda propiska qilingan (shu jumladan, vaqtincha propiska qilingan) yoki haqiqatda istiqomat qiluvchi shaxslar soni to'g'risidagi ma'lumotlar o'zgarganligi to'g'risida O'zbekiston Respublikasi Ekologiya va atrof muhitni muhofaza qilish davlat qo'mitasining hududiy organlari huzuridagi Sanitar tozalash xizmatlarini tashkil etish markazi (keyingi o'rinlarda Sanitar tozalash markazi deb ataladi) yoki uning tuman (shahar)ga birlashtirilgan vakillarini o'n ish kuni mobaynida xabardor qilish;

yirik gabaritli maishiy chiqindilar va qurilish chiqindilari, chorvachilik, shuningdek daraxt va butalarni kesish hamda agrotexnik ishlov berishdan hosil bo'ladigan chiqindilarni xususiy uy-joy mulkdorlari shirkatlari, fuqarolarning o'zini o'zi boshqarish organlari, professional boshqaruv tashkilotlari tomonidan belgilangan, vaqtinchalik maxsus ajratilgan joylarga joylashtirish va ular chiqindi to'plash shoxobchalaridagi konteynerlarga tashlanishiga yo'l qo'ymaslik;

Iste'molchi qonun hujjatlariga muvofiq boshqa majburiyatlarga ham ega bo'lishi mumkin.

#### 4. Ijrochining huquq va majburiyatlari

5. Ijrochi quyidagi huquqlarga ega: qattiq maishiy chiqindilarni olib chiqib ketish bo'yicha Iste'molchilarga ko'rsatilgan xizmatlar uchun to'lovlarni qonun hujjatlarida belgilangan tartibda, o'z vaqtida va to'liq hajmda olish;

yirik gabaritli, qurilish chiqindilari, suyuq maishiy va boshqa chiqindilarni alohida to'lov evaziga olib chiqish bo'yicha qo'shimcha xizmatlar ko'rsatish.

Ijrochi qonun hujjatlariga muvofiq boshqa huquqlarga ham ega bo'lishi mumkin. 6. Ijrochi quyidagilarga majbur:

o'ziga birlashtirilgan hududda fuqarolarning o'zini o'zi boshqarish organlari bilan kelishilgan jadvalga muvofiq belgilangan tartibda qattiq maishiy chiqindilarning muntazam olib chiqib ketilishini amalga oshirish;

qattiq maishiy chiqindilarni olib chiqishning minimal davriyligiga rioya etish: chiqindi to'plash shoxobchalaridan – bir kunda bir marotaba va yakka tartibdagi turar joy sektoridan “signal” usulida – uch kunda bir marotaba;

Iste'molchilarga qattiq va suyuq maishiy chiqindilarni olib chiqish bo'yicha qonun hujjatlari va ushbu shartnoma talablariga muvofiq zarur sifatdagi xizmatlar ko'rsatish;

Ijrochi tomonidan qattiq maishiy chiqindilarni olib chiqib ketish jadvaliga rioya qilinmagan hollarda Ijrochining dispetcherlik xizmatiga tushgan Iste'molchilarning buyurtmanomalarini operativ tartibda (buyurtmanoma kelib tushgan kundan boshlab bir ish kunidan kechikmay) bajarish;

ko'rsatilayotgan qo'shimcha xizmatlar uchun elektron to'lov tizimini joriy etish;

Iste'molchilarning ma'lumotlar bazasini yuritish va muntazam ravishda yangilab borish (ko'rsatilgan qo'shimcha xizmatlar bo'yicha);

qattiq va suyuq maishiy chiqindilarni to'plash va olib chiqish bo'yicha xizmatlar ko'rsatishning rejimi va sifati bo'yicha Iste'molchilarning murojaatlari, shuningdek, ularning ijrosi hisobini olib borish;

aholining to'liq qamrab olinishini ta'minlovchi va qonun hujjatlari talablariga muvofiq zarur miqdordagi chiqindi to'plash shoxobchalarining qurilishini amalga oshirish;

chiqindi to'plash shoxobchalari va konteynerlarning holatini nazorat qilib borish hamda ularning tegishli holatda saqlanishini ta'minlash;

chiqindi to'plash shoxobchalarining qattiq maishiy chiqindilarni to'plash uchun zarur miqdordagi konteynerlar bilan jihozlanishini ta'minlash;

chiqindi to'plash shoxobchalari va transport vositalarining zarur tarzdagi sanitariya holatini ta'minlash;

maishiy chiqindilarni mustaqil ravishda saralashni amalga oshirishni ta'minlash;

chiqindi to'plash shoxobchalarini joriy va mukammal ta'mirlashni amalga oshirish;

fuqarolarning hayoti va salomatligi, atrof muhit uchun xavfli bo'lgan bakteriyalarning va boshqa zararli moddalarning rivojlanishiga, chiqindilarning ko'plab to'planib qolishiga qarshi rejali ishlarni olib borish (konteyner va chiqindi to'plash shoxobchalarini dezinfektsiyalash yoki yuvib turish yo'li bilan va shu kabilar);

qattiq va suyuq maishiy chiqindilarni to'plash va olib chiqish bo'yicha xizmatlar ko'rsatishning tartibi va tariflarining o'zgarganligi to'g'risida ushbu tariflar kuchga kirishidan o'n besh kun avval Ijrochining stendida, e'lonlar taxtasida e'lonlar osish yo'li bilan, shuningdek, ommaviy axborot vositalari orqali Iste'molchini xabardor qilish;

Iste'molchilarga ularning so'roviga asosan qattiq va suyuq maishiy chiqindilarni to'plash va olib chiqish bo'yicha xizmatlar ko'rsatishning amaldagi tartibi, talablari, qoidalari va xizmatlar ko'rsatish tartibining, shuningdek, tariflarining o'zgarganligi to'g'risida bepul ma'lum qilish;

qattiq va suyuq maishiy chiqindilar bilan bog'liq ishlarni amalga oshirishda buzilgan yer uchastkalarini qayta tiklash ishlarini amalga oshirish;

Ijrochining stendida, e'lonlar taxtasida ko'rsatilayotgan xizmatlar, ularning amaldagi tariflari, to'lov shartlari, shuningdek, qattiq maishiy chiqindilarni olib chiqish jadvalini va mazkur shartnomani joylashtirish;

Iste'molchiga ko'rsatilayotgan xizmatlar sifati bo'yicha aniqlangan kamchiliklarni bartaraf etish va yangi kamchiliklarning oldini olish choralari ko'rish;

maishiy chiqindilarni to'plash va olib chiqib ketish bo'yicha xizmatlar ko'rsatish bilan bog'liq ma'lumotlar va buxgalteriya hujjatlari besh yil mobaynida but holatda saqlanishini ta'minlash.

Ijrochi qonun hujjatlariga muvofiq boshqa majburiyatlarga ham ega bo'lishi mumkin.

## **5. Hisob-kitob qilish tartibi va shartlari**

7. Qattiq va suyuq maishiy chiqindilarni to'plash va olib chiqish bo'yicha xizmatlar uchun to'lovlar majburiy hisoblanadi.

8. Qattiq maishiy chiqindilarni to'plash va olib chiqish bo'yicha xizmatlar uchun to'lovlar Iste'molchilar tomonidan to'lov amalga oshirilayotgan, o'tgan oydan keyingi oyning o'ninchi sanasidan kechikmay yagona tranzit bank hisobvaraqlariga to'lanadi va keyinchalik mahalliy davlat hokimiyati organlarining maxsus g'azna hisobvaraqlariga o'tkaziladi.

Yirik gabaritli maishiy chiqindilar va qurilish chiqindilari, suyuq maishiy chiqindilar, chorvachilik, shuningdek, daraxt va butalarni kesish hamda agrotexnik ishlov berishdan hosil bo'ladigan chiqindilarni olib chiqish bo'yicha

alohida xizmatlar uchun to'lovlar bevosita Ijrochining bank hisob raqamiga 100 foiz oldindan to'lov asosida amalga oshiriladi.

Maishiy chiqindilarni to'plash va olib chiqib ketish bo'yicha ko'rsatilgan xizmatlar uchun to'lov jismoniy shaxslarning ixtiyoriga ko'ra cheklanmagan holda tijorat banklari va to'lovlarni qabul qilish kassalari, elektron to'lov tizimi va boshqa to'lov shakllarida amalga oshiriladi.

9. To'lovni hisoblash tegishli davrlarda amalda bo'lgan qattiq maishiy chiqindilarni to'plash va olib chiqish bo'yicha xizmatlar uchun tariflar bo'yicha amalga oshiriladi.

Qattiq va suyuq maishiy chiqindilarni (yirik gabaritli maishiy chiqindilar va qurilish chiqindilari, chorvachilik, shuningdek, daraxt va butalarni kesish hamda agrotexnik ishlov berishdan hosil bo'ladigan chiqindilar bundan mustasno) olib chiqish bo'yicha xizmatlar uchun to'lov tariflari mahalliy davlat hokimiyati organlari tomonidan qonun hujjatlarida belgilangan tartibda tasdiqlanadi.

10. Iste'molchilar bo'nak tariqasida to'langan to'lovlar uchun, ushbu davrda tegishli tariflar oshgan taqdirda, to'lov amalga oshirilgan sanadan o'n ikki oydan oshmaydigan davrga qayta hisob-kitob qilishdan ozod etiladilar.

11. Maishiy chiqindilarni olib chiqib ketish bo'yicha xizmatlar uchun to'lovlarning qayta hisob-kitobi qonun hujjatlarida belgilangan tartibda amalga oshiriladi.

12. Maishiy chiqindilarni to'plash va olib chiqish bo'yicha tegishli bo'lmagan sifatdagi xizmatlar ko'rsatilganda yoki xizmat ko'rsatilmagan taqdirda Iste'molchi tegishli davr uchun to'lovlardan ozod etiladi.

13. Maishiy chiqindilarni to'plash va olib chiqish bo'yicha xizmatlar ko'rsatilmagan yoki tegishli bo'lmagan sifatdagi xizmatlar ko'rsatilganligi holati aniqlangan hollarda manfaatdor shaxslar tomonidan Iste'molchi, Ijrochining vakili, shuningdek, fuqarolarning o'zini o'zi boshqarish organlari yoki xususiy uy-joy mulkdorlari shirkati vakili tomonidan imzolananagan, xizmatlar ko'rsatilmaganligi yoki tegishli bo'lmagan sifatdagi xizmatlar ko'rsatilganligi holatini tasdiqlovchi dalolatnoma tuziladi.

Xizmatlar ko'rsatilmaganligi yoki tegishli bo'lmagan sifatdagi xizmatlar ko'rsatilganligi to'g'risida tuzilgan dalolatnoma qattiq va suyuq maishiy chiqindilarni to'plash va olib chiqish bo'yicha xizmatlar uchun to'lovlar miqdorini qayta hisob-kitob qilish, uchun asos hisoblanadi.

Ijrochi tomonidan ko'rsatilayotgan xizmatlar bilan bog'liq ravishda Iste'molchiga yoki uning mol-mulkiga zarar yetkazilgan taqdirda, Iste'molchi tomonidan qonunchilikda belgilangan tartibda yetkazilgan zarar holati qayd etilgan dalolatnoma tuziladi. Dalolatnoma Iste'molchining imzosi, Ijrochi, fuqarolarning o'zini o'zi boshqarish organlari yoki xususiy uy-joy mulkdorlari shirkati vakillarining imzolari bo'lgandagina haqiqiy hisoblanadi.

Ijrochining vakili kelmagan taqdirda fuqarolarning o'zini o'zi boshqarish organlari yoki xususiy uy-joy mulkdorlari shirkati vakilining imzosi yetarli hisoblanadi.

Ijrochining vakili dalolatnomani imzolashdan bosh tortgan taqdirda u ushbu dalolatnomaga imzo qo'yishdan bosh tortganlik sabablarini yozma ravishda asoslashi shart. Aks holda Iste'molchi maishiy chiqindilarni to'plash va olib chiqish bo'yicha xizmatlar uchun to'lovlarni sud qarori qabul qilinguniga qadar to'xtatishga haqlidir.

Mulk egalari tomonidan Sanitar tozalash markaziga yoki uning tuman (shahar)ga biriktirilgan vakillariga ko'p kvartirali va yakka tartibdagi uylarda haqiqatda istiqomat qilayotgan shaxslar yo'qligini tasdiqlovchi hujjatlar taqdim etilgan taqdirda, qattiq maishiy chiqindilarni to'plash va olib chiqish bo'yicha xizmatlar uchun to'lov undirilmaydi.

## **6. Iste'molchining javobgarligi**

14. Iste'molchi quyidagilar uchun javob beradi:

shartnoma majburiyatlarini bajarmaslik yoki zarur darajada bajarmaslik;

qattiq va suyuq maishiy chiqindilarni olib chiqish bo'yicha xizmatlar uchun to'lovlarni o'z vaqtida amalga oshirmaslik;

o'zlarining mulki bo'lgan ko'p kvartirali va yakka tartibdagi uylarda propiska qilingan (shu jumladan, vaqtincha propiska qilingan) yoki haqiqatda istiqomat qiluvchi shaxslar soni o'zgarganligi to'g'risidagi ma'lumotlarning noto'g'riligi va ularni o'z vaqtida taqdim etmaslik.

15. Abonentlar bo'yicha o'zgarishlar to'g'risidagi ma'lumotlarga kiritilmagan va ular haqida Sanitar tozalash markaziga taqdim etilmagan yangi abonentlar yoki birga istiqomat qiluvchi shaxslar aniqlanganda, qattiq maishiy chiqindilarni to'plash va olib chiqib ketish bo'yicha xizmatlar uchun jismoniy shaxslar tomonidan majburiy to'lovlarni to'lash va hisobini yuritishning yagona elektron tizimida abonentlar va birga istiqomat qiluvchi shaxslar soniga tuzatishlar kiritiladi.

Bir vaqtning o'zida, tasdiqlovchi hujjatlar mavjud bo'lganda (fuqarolarning o'zini o'zi boshqarish organi yoki Sanitar tozalash markazi xodimi tomonidan tuzilgan dalolatnoma, ichki ishlar organlari tomonidan propiska qilinganligi (shu jumladan, vaqtincha propiska qilinganligi)ning tasdig'i, fuqarolik holati dalolatnomalarini yozish organi (FHDYO)ning tug'ilganlikni qayd etish to'g'risidagi va boshqa ma'lumotlar), qattiq maishiy chiqindilarni to'plash va olib chiqib ketish xizmatlari uchun majburiy to'lovlar bo'yicha qarzdorlik, haqiqatda istiqomat qiluvchi

shaxslar soni ortgan (ko'chib kirish, tug'ilish va shu kabilar) vaqtdan boshlab to'liq qayta hisoblab chiqiladi, tasdiqlovchi hujjatlar mavjud bo'lmagan holatlarda esa – o'tgan uch oy uchun hisob-kitob qilinadi.

16. Mablag'lar o'z vaqtida o'tkazilmagan taqdirda muddati o'tkazib yuborilgan har bir kun uchun qarzdorlik summasining 0,1 foizi miqdorida, biroq qarzdorlik umumiy summasining 50 foizidan ortiq bo'lmagan miqdorda penya undiriladi.

## **7. Ijrochining javobgarligi**

17. Ijrochi quyidagilar uchun javob beradi:

shartnoma majburiyatlarini bajarmaslik yoki zarur tarzda bajarmaslik;

maishiy chiqindilarni to'plash va olib chiqish bo'yicha ko'rsatiladigan xizmatlar muddatining va ushbu xizmatlar ko'rsatilayotganda aniqlangan kamchiliklarni bartaraf etish muddatlarining buzilishi;

xizmat ko'rsatmaslik yoki sifatsiz ko'rsatilgan xizmatlar natijasida Iste'molchining hayoti, salomatligi va mulkiga yetkazilgan zarar.

18. Xizmat ko'rsatilmagan yoki tegishli sifatda bo'lmagan xizmatlar ko'rsatilgan taqdirda Ijrochi qonun hujjatlarida belgilangan tartibda jarima to'laydi.

## **8. Shartnomaning amal qilish muddati**

19. Shartnoma ommaviy axborot vositalarida e'lon qilingan kundan boshlab kuchga kiradi.

20. Shartnoma Iste'molchi tomonidan ommaviy taklif (oferta) qabul qilgan (akseptlagan) paytdan boshlab tuzilgan hisoblanadi. Iste'molchi tomonidan ushbu shartnomada ko'rsatilgan shartlarni bajarish yuzasidan qilingan harakatlar (chiqindi to'plash shoxobchalarida chiqindilarni joylashtirishda, chiqindilarni konteynerlarga tashlash yoki Ijrochining maxsus avtotransport vositasiga joylashtirish, ko'rsatilgan xizmatlar uchun tegishli summani to'lash va shu kabilar) aksept hisoblanadi.

21. Shartnoma nusxalari u kuchga kirgan sanadan boshlab bir kun mobaynida xizmat ko'rsatiladigan hududdagi fuqarolarning o'zini o'zi boshqarish organlari va xususiy uy-joy mulkdorlari shirkatlariga yuboriladi (shaxsan imzo qo'ydirilgan holda yoki taqdim etilganligi to'g'risidagi bildirishnoma bilan pochta orqali).

22. Shartnoma nomuayyan muddatga tuziladi.

## **9. Nizolarni hal qilish**

23. Tomonlar o'rtasidagi kelishmovchiliklar bo'yicha nizolar qonun hujjatlarida belgilangan tartibda hal etiladi.

## **10. Ijrochining rekvizitlari:**

Manzil: Tashkilot manzili

Telefon Tashkilotning telefon raqami

Bank nomi: Tashkilotning bank nomi

H/r: Tashkilotning hisob raqami

MFO: Tashkilotning bank kodi MFO

STIR: Tashkilotning STIR raqami

IFUT: Tashkilotning IFUT raqami

(rahbarning F.I.O.) Rahbarning F.I.O.(imzo) \_\_\_\_\_